



Amaran!

Pihak Jabatan Agama Islam Perak tidak bertanggungjawab terhadap sebarang penambahan ayat selain kandungan khutbah yang dikeluarkan.

“TANGGUNGJAWAB PEMIMPIN MEMAKMURKAN NEGARA MERDEKA”

28 Ogos 2026 / 15 Rabiulawal 1448

الْحَمْدُ لِلَّهِ¹ الَّذِي أَنْعَمَ عَلَيْنَا بِنِعْمَةِ الْأَمْنِ وَالْأَمَانِ، وَأَكْرَمَنَا بِنِعْمَةِ الْحُرِّيَّةِ وَالْإِسْتِقْلَالِ،
وَجَعَلَ الْأَوْطَانَ مَوَاطِنَ لِلطَّاعَةِ وَالْعِمَارَةِ وَالْإِحْسَانِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا
شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا
مُحَمَّدٍ²، وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ،
اتَّقُوا اللَّهَ³، أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Jemaah yang dirahmati Ilahi,

Marilah kita meningkatkan ketakwaan kepada Allah SWT. Taatilah semua perintah dan tinggalkanlah segala larangan Nya. Ikhhlaskan hati dalam setiap amal perbuatan, serta syukurilah anugerah iman dan Islam yang dikurniakan. Segala puji bagi Allah yang telah mengurniakan kepada kita nikmat keamanan dan keselamatan, serta memuliakan kita dengan nikmat kebebasan dan kemerdekaan. Dia menjadikan tanah air sebagai tempat untuk melaksanakan ketaatan, membangunkan kehidupan dan melakukan kebaikan.

Kita memuji Nya atas segala nikmat yang agung, dan kita bersyukur kepada Nya atas segala kurniaan yang besar. Kita memohon kepada Nya agar keamanan dan keselamatan sentiasa berkekalan, serta melindungi negara dan rakyat daripada ancaman, bencana dan malapetaka. Menjelang sambutan ulang tahun kemerdekaan negara kali ke-69, mimbar akan menyampaikan khutbah bertajuk:

“TANGGUNGJAWAB PEMIMPIN MEMAKMURKAN NEGARA MERDEKA”

Negara kita diisytiharkan sebagai sebuah negara merdeka pada 31 Ogos 1957. Apakah ertinya sebuah negara merdeka? Negara merdeka ialah sebuah negara yang bebas daripada penjajahan, penguasaan atau campur tangan kuasa asing,

¹ Pujian kepada Allah SWT

² Selawat ke atas Nabi Muhammad SAW

³ Pesan Taqwa

serta mempunyai hak dan kuasa untuk menentukan sendiri pemerintahan, undang-undang, pembangunan, ekonomi dan masa hadapannya.

Dari sudut Islam, kemerdekaan juga boleh difahami sebagai kebebasan manusia daripada pengabdian kepada sesama manusia, menuju pengabdian hanya kepada Allah SWT, juga kebebasan daripada kezaliman dan penindasan.

Jemaah yang dikurniai rahmat Ilahi

Merdeka tidak pula bermaksud kita bebas untuk melakukan apa sahaja. Merdeka bermaksud kita bebas menentukan masa depan sendiri, namun terikat dengan amanah untuk mempertahankan kedaulatan, memelihara keamanan dan memakmurkan negara. Kemerdekaan bukan sekadar bebas daripada penjajah, tetapi kebebasan untuk menentukan nasib sendiri dengan penuh tanggungjawab, mempertahankan maruah bangsa, menegakkan keadilan dan membina sebuah negara yang aman, makmur lagi sejahtera.

Oleh itu, para pemimpin atau *ulil amri* yang telah diamanahkan dengan kuasa untuk mengurus tadbir sebuah negara merdeka, hendaklah menyempurnakan amanah tersebut berpandukan firman Allah SWT:

﴿الَّذِينَ إِنْ مَكَّنَّاهُمْ فِي الْأَرْضِ أَقَامُوا الصَّلَاةَ وَآتَوُا الزَّكَاةَ وَأَمَرُوا بِالْمَعْرُوفِ وَنَهَوْا عَنِ الْمُنْكَرِ ۗ وَاللَّهُ عَاقِبَةُ الْأُمُورِ﴾

Bermaksud; "laitu orang (Islam) yang jika kami teguhkan kedudukan mereka di muka bumi, nescaya mereka mendirikan solat, menunaikan zakat, menyuruh berbuat yang makruf dan mencegah daripada perbuatan yang mungkar; dan ingatlah kepada Allah jua kembali segala urusan". (Surah al-Haj, ayat 41)

Tanggungjawab pemimpin untuk memakmurkan sebuah negara merdeka bukan sekadar mengurus tadbir, tetapi memastikan kemerdekaan itu benar-benar membawa keamanan, keadilan, kesejahteraan dan maruah kepada rakyat. Antara tanggungjawab utama pemimpin ialah:

Pertama: Menegakkan keadilan – berlaku adil tanpa mengira agama, kaum, kedudukan atau fahaman. Firman Allah SWT;

﴿ إِنَّ اللَّهَ يَأْمُرُكُمْ أَنْ تُؤَدُّوا الْأَمَانَاتِ إِلَىٰ أَهْلِهَا وَإِذَا حَكَمْتُمْ بَيْنَ النَّاسِ أَنْ تَحْكُمُوا بِالْعَدْلِ إِنَّ اللَّهَ نِعِمَّا يَعِظُكُمْ بِهِ إِنَّ اللَّهَ كَانَ سَمِيعًا بَصِيرًا ﴾

Bermaksud: Sesungguhnya Allah menyuruh kamu menyerahkan amanah kepada ahlinya (yang berhak menerimanya), dan apabila kamu menetapkan hukum antara manusia, (Allah menyuruh) kamu menghukum dengan adil... (Surah al-Nisa': 58)

Kedua: Memelihara keamanan dan kedaulatan negara – mempertahankan kemerdekaan dengan menjaga keselamatan, sempadan negara, kestabilan politik, dan keharmonian masyarakat.

Ketiga: Meningkatkan kesejahteraan rakyat – kemakmuran negara harus dirasai oleh semua lapisan rakyat melalui peluang pekerjaan, pendidikan, khidmat kesihatan, perumahan, pengangkutan, kemudahan awam dan jaringan perlindungan sosial yang baik.

Keempat: Mengurus kekayaan negara dengan amanah – hasil bumi, cukai dan khazanah negara bukan milik peribadi pemimpin; di sebaliknya merupakan amanah yang perlu digunakan untuk kepentingan rakyat serta generasi akan datang. Kekayaan hendaklah dielak daripada berlegar dalam kalangan kaum keluarga dan kenalan peribadi.

Kelima: Membanteras rasuah dan salah guna kuasa – rasuah melemahkan negara, merosakkan institusi, menghilangkan kepercayaan rakyat dan boleh menggadaikan kedaulatan negara.

Keenam: Membangunkan ilmu dan modal insan – melalui program membina masyarakat berilmu, berkemahiran, berakhlak, serta mampu bersaing, kerana kemerdekaan negara tidak bermakna, sekiranya rakyat masih dibelenggu kejahilan.

Ketujuh: Memelihara perpaduan rakyat – menjadi pendamai, bukannya pencetus perpecahan melalui kebijaksanaan mengurus secara berhikmah perbezaan kaum, agama dan pandangan politik.

Kesimpulannya, kemerdekaan memberi kita kuasa menentukan haluan sendiri, kepimpinan pula menentukan sama ada kuasa itu membawa kemakmuran atau kemunduran. Amanah terbesar seorang pemimpin ialah memastikan nikmat kemerdekaan diterjemahkan kepada keadilan, keamanan dan kesejahteraan negara dan rakyat. Justeru itu, pemimpin tidak cukup sekadar mewarisi sebuah negara merdeka, tetapi mereka bertanggungjawab memastikan kemerdekaan itu menghasilkan sebuah negara yang berdaulat, adil, aman, makmur dan bermaruah.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

Khutbah Kedua

الْحَمْدُ لِلَّهِ⁴ حَمْدًا كَثِيرًا طَيِّبًا مُبَارَكًا فِيهِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، يَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin, serta mengikutinya daripada kalangan *Asyairah Maturidiah*. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ
عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ
حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ⁸، وَأَصْلِحْ ذَاتَ بَيْنِهِمْ
وَالْفَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.
اللَّهُمَّ أَعِزِّ الْإِسْلَامَ وَالْمُسْلِمِينَ وَانصُرْ إِخْوَانَنَا وَأَخَوَاتِنَا وَأَطْفَالَنَا فِي فَلَسْطِينَ، وَاحْفَظْ أَهْلَهَا
وَانصُرْ جُنُودَهَا وَدَمِّرْ أَعْدَاكَ أَعْدَاءَ الدِّينِ يَا رَبَّ الْعَالَمِينَ.

Ya Allah! Ya Rabbal 'alamin!, Limpahi rahmat Mu, agar negara kami Malaysia kekal sebagai sebuah negara merdeka yang berdaulat, aman dan makmur, dan rakyatnya hidup dalam rukun dan damai. Satukan hati rakyat negara ini dengan semangat ukhuwah, perpaduan dan kasih sayang, serta jauhkan kami daripada perpecahan dan permusuhan. Limpahi rahmat Mu agar negara kami berada dalam keadaan selamat dan makmur, rakyatnya hidup dalam suasana aman dan muhibah.

Ya Malikul Mulk!, Kurniai kami pemimpin yang baik, serta dikelilingi oleh penasihat yang jujur, amanah dan berani mengingatkan apabila tersilap. Hindari negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah lagi ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Mannan! Ya Razzaq!, berkatilah hamba Mu yang melaksanakan zakat, wakaf dan sedekah. Kurniai mereka rezeki berlipat ganda, sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

⁷ Ayat Al-Quran

⁸ Doa untuk Kaum Muslimin

Ya Muiz! Ya Adzhiim! Ya Kabiir!, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ
عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَى
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.